



DEO OPT. MAX.  
UNI ET TRINO,  
VIRGINIQUE DEIPARÆ  
ET DIVO LUCÆ  
ORTHODOXORUM MEDICORUM PATRONO.  
QUÆSTIO MEDICA.

*Quodlibetariis disputationibus manè discutienda in  
Scholis Medicorum, die Jovis vigesima tertia  
mensis Februarii 1713.*

M. HENRICO BESNIER, Doctore Medico,  
Præsides.

*An à salibus Digestio?*

I.

**A** Chymicis non parùm utilitatis Medicina percepit. Suis debetur anti-  
quis honos. Nobis sapientiâ non inferiores palmam, si reviviscerent,  
fortè deberi faterentur. In enodandis corporis humani functionum  
miraculis quid conferunt facultates, temperamenta, elementa? quibus si no-

minis vanitatem detraxeris, fortè nihil supererit, quod mens assequi possit. Felicior hæc ætas sibi ex veterum observationibus nata commoda velut hereditario jure arrogavit, & novis adjectis rimando ipsa naturæ viscera, causas ignis ope expiscari tentavit. Salibus, sulphuribus, phlegmate & terrâ deprehensus, Recentiores naturæ studiosi laudabili conatu & sanè non infelici, omnia ab istis phænomena deduxerunt. Hinc tot luminibus fulget nova Medicina, tam perspecti corporis humani motus, sive juxta leges à natura præscriptas exerantur, sive defleant à legibus. Hinc tam perspecta vis & tantæ pharmacorum veteribus ignota species, quæ si à sapientibus industriâ manu exhibeantur, tot solvunt morbos pertinaces & ancipites quos antiqua Medicina suæ sorti committebat. Hinc digestionum, variorum motuum, quibus corporis solidæ partes abripiuntur, fluidæ conteruntur, effervescent, præcipientes agunt partes heterogeneas à cæteris dissociabiles, tam constans & æquabilis impetus, hinc denique & sanitatis integritas, sulphuribus, salibus, phlegmate & terrâ æquâ ratione inter se contemperatis, & exitialis fieri necessitas, et cohesione inter hæc principia deletâ & dissolutâ,

## I I.

**R**UDIS Chymicorum esset, quid digestionem à salibus fieri inficiaretur. Tanto salium genere imprægnantur & solida & liquida alimenta cæteraque corpora, ut inde efficaciam ea nacta fuisse constet. Vere novo terrâ solutâ, aquis dissoluti sales ærei quibus terræ sunt prægnantes in tubulos arborum & plantarum, tracheis per spatia juvantibus devehuntur, in solidam substantiam cum aliis principiis faciescunt, vimque vel medicatricem vel alimentariam impertiuntur. Unde nisi à salibus phlegmate solutis tantopere vinum, grana omnis generis, fructus fermentescunt. Tanta æris eâ fermentatione copia gignitur, ut ex pyris contritis elicitus ær in machina pneumatica ad centum digitorum altitudinem mercurium evehat. Scrutare singula naturæ opera; ex istis præcipuum, digestio; voluntur & revolvuntur in ventriculo alimenta benigniori & tonicâ ventriculi contractione, sales succi digestivi è glandulis erumpentis, potulentis soluti impingunt in ergastula, quibus coërceatur quem nutritiæ plantæ hauserunt à terræ visceribus salium proventus; in libertatem vindicantur, secum invicem magnâ luctâ congregiuntur, & totius molis solvitur compages,

## I I I.

**A** Sulphuribus deducendos esse admirabiles naturæ labores & industriam commentum est, ingeniosum quidem, commentum tamen. Quanto rectius à salibus repetendi erunt & tumultus quos inter se cient sibi committit varii liquores chymici, & calor vel frigus quod ex quorundam mistura percipitur. Genesim salium ab ipso Deo exortam confitebitur quisquis velut indomitam eorum naturam fuerit contemplatus. Metalla imitantur quæ vim om-

nem eludunt, eâ pertinaciâ, ut indolem nunquam deponant; diversam & sales & metalla larvam induunt, eâ detractâ, sibi-ipsis, integritatque suæ restituantur. Nos ducti sensibus tot excogitavimus salium species, quot in animam sensationes inducuntur, splendidâ, at mendaci fascinatione. Unicam esse remur in natura salis speciem, quod acidum dixerimus. Pro ratione, & cohesione hujus principii cum cæteris, aut amaritudinem, aut acorem, aut asperitatem & acerbitem infert in linguam, terrâ, phlegmate, sulphuribus quasi vinculis, & variâ intercapedine mitigatum & sejunctum, non linguæ & visceribus eam infert molestiam, quâ afficerentur, si ab aliis principiiis spoliatum, ut sit arte chymicâ, in membranas vires omnes exereret.

#### I V.

**A**LIMENTA contrita dentibus, imprægnata salivâ, & salium conatibus magis patefcunt, & ex fragilioribus parietibus jam constant quàm ut imperus illorum sustineant. Fractis tumultus concitantur, sales tum phlegmate copioso natant, delapsi in intestina novum cum bile & succo pancreatico certamen ineunt, sulphurea sulphureis, salina salinis, terrestria terrestribus confociantur: quæ volatilia ex eo conflictu eruperunt, suprema petunt, quæ gravioris sunt ponderis delabuntur in præceps. Injuriâ credideris istud ex vividioris imaginationis jucundo & palpante errore esse deductum. Consule chymicos artifices; contemplare, permixtis liquoribus, efferos quos edunt tumultus, substantiarum discrimina, varias præcipitationes pro salium diversi generis varietate, qui certis in liquoribus aut redundant aut deficiunt. Perpendas panem dentibus subactum salivâ imbutum, in loco calidiori, sed humido repositum, in chylum totum abire; miscueris salem acidum volatilem Tachenii cum omni ciborum genere, quos simul cum eo sale contriveris non absimilem chylo naturali tibi chylum referent. Stabit inconcussum istis argumentis omnia liquida salibus tum volatilibus tum fixioribus fœta esse; hæc dum impingunt in membranas benignâ titillatione sollicitant; innato sibi elatere istæ tantum resiliunt quantum premuntur, & motu oscillatorio coarctant quem completur liquorem, atque ulterius urgent, is mole suâ vasorum parietes ab invicem diducit. Sic absolvitur & tritura liquidorum & eorundem fermentatio.

#### V.

**P**LURIMA in humano corpore tanto splendent lumine, tantâ oculis rapiunt pulchritudine, ut hominem jure dixeris omnium quæ toto in orbe pariunt admirationem esse compendium. Digestio minus sensus ferit, magis caput animum & allicit. Quomodo ex crassâ rudique materiâ tantæ tenuitatis & exquisitæ virtutis substantias quispiam autumat exprimi posse, nisi ipse experiretur? At quoniam vulgaribus minus movemur, vix ad ea quoque animum appellamus. Torpesceret tanto artificio fabricatâ machina corporis, nisi fluidis variorum salium singulari virtute & acumine armatis in eos motus erumperet, qui & animalibus functionibus & voluntatis imperiis obcundis

inserviunt. Tot incerniculis, funibus, rotis, trochleis, vectibus tam mirâ inter se cohesione mathematicâque ratione aptatis stupenda machina constat, ut omni careat fide, simplici liquido salino in diversos tubulos illabente, & moveri tot varias partes, & tot officii defungi ut omnium sæculorum acutissimi Philosophi exclamaverint corpus humanum omnium miraculorum esse inexhaustam congeriem.

*Ergo à salibus Digestio.*

Domini Doctores. disputaturi.

*M. Michaël Procope Con-*  
*teaux.*

*M. Claudius du Corf.*

*M. Franciscus Vezou.*

*M. Joannes Claud. Adrian.*  
*Helvetius.*

*M. Joannes-Bapt. Engu-*  
*hard.*

*M. Dominicus de Forey.*

*M. Salvator Cluscard.*

*M. Claud. Vergne.*

*M. Claudius Guerin.*

*A Sextâ ad Meridiem.*

Proponebat Parisiis EMMANUEL-MAURITIUS DU VERNEY,  
Parisiinus, Baccalaureus Medicus, A. R. S. H. 1713.

---

PARISIIS,

Apud JACOBUM QUILLAU, Typographum Juratum Universitatis,  
in viâ vulgò dictâ, *Galande.*